

聚學軒叢書

008

Z12

102

東學軒叢書第四集第十三

退

餘

業

語

二

齋

退餘叢話卷一

聚學軒叢書第四集

歙縣鮑倚雲撰

貴池劉世珩校刊

余嘗論孟子天降大任之說不在大任降後見奇奇在
聖賢豪傑先具一副心志筋骨身體足以受造物之磨
礪愈磨礪愈精神若吾輩勞苦困餓本來心志筋骨身
體相去懸絕直是不堪磨礪此小人之所以長戚戚而
天初不與聞也世人常舉此段書作窮愁慰藉之言殊
可笑要之趣向不可歧胸次不可窄先儒云常自激昂
便不到得墜墮

客有言吾鄉羅翁某少日讀書山館欲私一鄰婦婦告
其姑姑曰高門巨族生兒牽富貴中人吾窺羅郎非凡

流感其氣類以昌吾後未可知越日羅復與狎婦欣然
羅怪其平日之矯也叩之婦以姑言告羅憬然曰爾姑
聞知不可遽扃其戶而歸後其妻有娠卽大中丞應鶴
公也余謂鄰媼識解甚奇而羅翁悟機敏銳斷割邪念
亦卓不可及縉紳士大夫不自貴重縱慾宣淫下及僕
婦賤人以致奴壓其主而旁枝別附蟬蛻狼跳往往竊
發於其間可不戒哉可不慎哉

畢夢星字庚華與吾同日黌宮頗習詩賦癸丑秋寓郡
城贈余五古一篇用二十五有韻幾徧記其贈程生易
門七律次章云江南江北兩徒違贏得鄉園子傍依淺
水渡頭孤客棹夕陽邨口故人扉論心未便知今是感

舊還應念昨非顧我正如秋燕子飛飛底事又言歸余
時語程生云詩雖佳不免花飛葉落昨歲聞其病甚失
血歸自京師有句云病久自知能不死書來何意竟還
家未幾死矣其叔氏克繩性豪侈賈於霍十年間揮手
數萬金今夏亦得失血證輿丁十數人舁歸桐城病不
可起積逋盈萬年纔五十二余見其五十辭壽詩秋氣
太重有滿袖清風一枕涼之句信乎詩讖之說非洪容
齋所得而奪也

八月二十夜夢余殯發就葬儀從甚盛魂忽栩栩出登
一大阜平沙半畝許其右則歐陽公墓余以竹畫沙上
作隸體自書墓表文頗長字方二寸余旁一人以手搗

之沙平字陷宛如碑刻末行方擬署一顯者名未落筆而醒

畢庚華自少穎敏伴松稱其十一二歲時長老令屬對五七字句皆應答如響一日指鵬字難之曰鵬非鳥友庚華機稍阻卽詭爲便旋狀潛入書室翻字彙一閱急趨出應曰有對矣鰲豈魚妻聞者歎爲工絕

畢庚華赴試京闈叔氏克繩送別有此去三千里之句經片不能對久之乃成西風一葉秋五字頗躍然自喜以抗志青霄人而特作哀颯之音相贈詩雖工庚華下第且死矣猶憶吾里程君雪崖以選貢入都年纔逾冠新娶市月兩老人在堂履境頗順無端作北上四別詩

別親別內別姪別友中有涕淚白雲涼風離哀等字良
齋先生見之謂其兒女情多風雲氣少江蒿坪先生亦
以爲言其明年母夫人歿所別之姪亦歿服纔闋九月
太翁歿未幾夫人歿凶變迭乘雖有命數而氣象亦有
動乎四體者矣近雪翁訂正舊詩頗悔其少作去寒瘦
而爲清華爲雄壯以彼其才當不應樊籛老之

余生長憂患中落筆輒作愁苦語世父太史公會痛斥
之自先人見背兄弟離散艱苦且百倍於曩時乃悟委
靡不振窮蹙愁怨之氣足以召殃咎頗自猛省盡焚其
舊口詩詞庚戌春服闋時年二十三歲在錢唐將歸應
新安童子試伯兄爲詩惜別余和詩有爭教拭目看雛

鳳特取芳音付雁鴻之句詩雖不佳是歲頗受此句之益閱今八載潦倒無狀故態復萌自渡江以來留邗上兩月轉客此間誓不作淒涼語明年此病其有瘳乎九月二十九日記

在邗上與江冷紅論詩文亦謂吾輩須略具英異之概何苦落筆輒颯颯然鬼氣欲來也因舉李丹壑詩極多佳製如四野牛羊時有笛一邨桃李晝無人豈不工絕然大有鬼氣

山陽杜某詠黃鸝詩有黃鸝養就嬌情性罵得桃花沒處飛之句人因稱爲杜黃鸝

程冠雲云朱買臣爲會稽太守歿後會稽人立廟祀焉

其妻塚適在廟前堵牆蔽之輒爲風雨所圯旋修旋圯人因目爲羞塚前歛令杜公渙直隸新安人告某云椒山先生祠在新安神像塑後輒裂其頸屢修屢裂事頗奇余因以歎天之成人材其善也惟恐其不著厯千世而逾著其醜也惟恐其或掩厯千世而逾不能掩

伴松主人藏有太原王氏平谷縣合葬山圖地形奇麗堪輿家謝某說甚長姑不載中有離鄉則貴之說葬一紀王氏果挈家遷吳門其裔有號學田者念先墓之遠而不能以時祭掃也繪爲圖以示其後人噫墓存否王氏富貴與否且勿論何物賢裔并其地圖而賣之哉抑偶遺落於此也夫所貴乎有後者爲能守先人邱壟奉

血食也流落天涯不獲歸鄉井則已至信形家言離鄉得貴遂拋去先墓而因以爲利太原王氏巨族也當不謂然異日道過吳門訪其自燕來遷之孫子猶有存焉者乎平谷縣屬順天府其地在北山之麓離城十里土名北關邨其形曰嘯天龍離邨又三里許其葬之年爲康熙辛未跋其圖說者其宗人曰朝桓題識月日則癸未也

六安農人鋤地得開元錢一缸好事者爭以二三錢易其一伴松主人購得數百古色燦爛紅綠相雜其堆藍處尤可寶愛非復眼前靛青可擬質凝厚完好俗傳初成明皇持示太真太真以指掐其背故每錢有指痕彎

環如半鉤月余細較之其痕或左或右或向或背又或
中多一點如太極圖如篆法月字狀疑唐時別有說焉
俗傳不可信或又云開通元寶非開元也文法園讀古
錢多此式未知孰是冠雲又謂漢五銖及半兩錢出土
皆綠色惟開元錢色獨深青曾目擊千數無或夾伴松
云卑溼處藏久則紅綠高燥處則青二說宜質之雅鑒
家

舒城人許某有句云槐樹陰深沙店小菜花風細土牆
低余聞之三河山人何在揚在揚故任氏僕也其老主
人曾爲吾鄉績溪廣文教在揚作詩粗通字義往來江
淮間苦竹伴松輩頗不鄙夷之因渠作白燕數章有時

譽卽呼爲何白燕句云寄語能詩貴公子臨風憐取白衣人亦清婉可念嘗客廬州頗悉合肥相國家事蓋與龔溥有戚誼云

何在揚甚樸拙貧且老矣今年五十九性嗜書畫古器皿嘗以骨董遊歷富貴朋曹間篋中頗有祕籍

江南老布衣蔣衡字湘帆別字拙存以書名世家金壇老於淮揚間季虎先生鳴玉之孫也余雅嗜先生文其刻諸坊間者僅三數篇頃聞布衣家藏先生制義不下四五百篇外人未及寓目雄文鉅製片玉碎金美不勝採奇不勝探吾里張珂鳴曾假閱一晝夜特草草摘其驚人之句爲一小帙未卒業布衣堅索以去夫爲人子

孫不能闡揚先緒使遺文大集播諸天壤而遏抑閉掩
不使稍露吾求其說而不得殆以供門內不肖之鈔襲
而已矣陋矣夫

龔合肥有尺牘五本未刻者在揚說劇佳其後嗣既無
力付梓又恐遺失不假出門間有就其家鈔得者

何山人述舒城郭某九日聞雁句云黃花市地雁留影
秋色滿城人擣衣山人改色字爲月字頗當郭未之信
也又稱苦竹山人張純五言有斷雲開雁路落木掩蟲
聲一聯亦劇佳又李某詩有九月新霜酣橘柚一燈舊
雨話江山之句李故興化李文定公會孫也

方畚山先生少日有侍婢曰琴香臨水澣衣畚山從其

後戲之婢就地拾淤泥汚畚山頗夫人從樓上望見乃
罷去後作詠燕詩諷畚山云如何不向畫梁棲漫逐東
風上下飛欲採芹香猶未得觜邊空自帶泥歸

分宜當國時奴僕無不橫恣者獨一人舉止頗謹李文
定公問之對曰日不常午後分宜敗詔文定籍其家家
人奴婢及器用財賄悉登諸簿報名及此僕公命釋之
何山人述其曾孫某言如是

火雞食火其毛如鷹背色可織爲布積塵垢擲置火中
移時則光潔如故名火浣布火於鑪炭爲宜勿近燈煙
恐油污之卽黑若經水則爛又四足雞三足鴨雙頭蛇
及魚皆何山人所親見見蛇則死之說頗不確其形較

細腹赤色性最下急遇食則兩首爭持盤旋不定或至不食而死

巢湖古巢州地相傳有龍謫於此化爲巨魚巢人爭割食之有一老嫗獨不往夜夢神告曰此地當陷第看州衙前石獅眼赤汝當避之嫗旦日以語鄰人且時時詣石獅前諦視眾遂給之竊以硃塗獅目嫗見急趣眾走避眾共掩口笑嫗獨挈其家遁州果陷有二婦人奔百餘里至舒城治復陷其地名姑嫂塘此命數之不可逃者何山人曰事載廬州志又云每大旱或大霧時湖中隱隱有城郭市廛如覩人煙如聞雞犬

項羽廟在烏江廟門臨江每風浪大作行人燒紙錢輒

息有秀才題詩曰君不君兮臣不臣緣何立廟在江濱
平分天下猶嫌少一陌黃錢值幾文一夕廟忽背江別
向手仗劍塑像猶勃勃作怒意一御史過題壁有仗劍
不須懷舊恨漢家今已屬他人之句劍忽墮地江岸前
高坡舊傳騅馬滾臥處其土不生草舟過可望見舟人
類能言之語皆近幻然余見曝書亭集載廟後每遇大
風陰雨時林木如有金鐵錚鏦之聲則信或有之事亦
載和州志

蘭亭內永字無畫發筆處微折轉和字口下橫筆稍出
年字懸筆上湊頂在字左ノ反剔歲字有點在山下戈
畫之右事字斜拂不挑流字乙字就回筆不是點是字